

# 福建通志

第捌拾肆冊  
儒行傳

K295.7  
1

福建儒行傳卷一

自來方志大率以庸德之行庸言之謹者入儒行傳蓋以爲儒行傳創自史記漢書因之專以傳述經之人其他無與也然觀此則抗志希哲躬行實踐者將無類可歸收載記儒行一篇凡修身踐言謂之善行固不具備有一於此皆儒也用創立儒行傳

宋一

朱弼字君佐建安人精究五傳旁貫數經開寶中詣金陵一舉以關頭中第授國子助教知廬山國學生徒數百而盧絳諸葛洪蒯益輩事飲博多橫逆衆苦之學官依違無敢問者及弼至性本嚴重動持禮法每升堂講釋生徒環立各執疑難問辯鋒起弼應聲解說莫不遵理雖題非已出而事實聯綴宛若宿構以故諸生誠服皆循規範絳等稍稍引去四方肄業者多造焉弼短一足時謂之跛子先生及建康平例入京師授衡山簿居官廉潔事上無諂每俸給不充則虛腹度日妻子服御寒暄不繼時皆歎

服出見衡嶽崇峻遂有終老之志秩滿致仕守嶽廟令食本官俸數年卒  
四壁蕭然衣食棺殮皆資于故人君子以爲清

馬令南唐書陸游南唐書

林緒莆田人五代末杜門避世慕陶靖節嚴光之爲人窮索古典脫屣功  
名大中祥符七年詔舉潭州郡以緒應舉詔書云朕網羅遺逸崇獎風  
化苟一善之可稱俾釋巾而筮仕以爾居閑越之俗爲鄒魯之儒頗飭行  
藏聞於鄉黨宜覃麗澤往教州庠特授將仕郎本軍教授中書侍郎向敏  
中之詞也

莆田文獻

林煥字希顏閩縣人淳化三年進士累官度支員外郎秘閣校理知明  
州淳懿孝友士大夫多重之

八閩通志

留從諱永春人從効諸弟也淳化中爲泗州長吏有清節官卑俸薄雖藜  
藿不充未嘗妄干人太宗聞之召赴闕特遷揚州觀察使

道光舊志

方儀莆田人父仁岳仕閩王氏官至祕書少監始興化軍未有學儀以布  
衣詣闕上書乞建郡學立宣聖廟咸平元年得旨賜地儀傾家貲助成之

二年儀與弟能從子慎言舉茂才至京師復拜疏於朝請大其址修三禮堂步廡廊崇經閣及學制之未備者詔給錢三十萬明年儀登進士第歷官大理寺丞遷著作佐郎卒郡學繪其像祀焉子正中景祐元年諸科授泉州長吏

莆陽文獻閣書

余咸熙閩縣人性凝簡操履純潔富太宗時應舉不利遂終身不出有文集十卷

東越文苑

宋程字公範晉江人有文行大中祥符二年進士宰相愛重以爲國器坐剛直忤權貴終著作郎台州通判

閩書

方峻字景通莆田人天聖八年進士爲建安簿景祐初試秘書郎福州左司理嘉祐中請老分司南京榜所居堂曰植德堂之南曰小隱聚徒講學鑿井舍旁禱曰願子孫官居如此水初峻官潤州識程珣及卒程顯撰行狀范祖禹爲神道碑子士寧子容元家

士寧字彥昌少聰強時方習尚詩賦士寧推究經史尤工古文詞第慶曆

六年進士令劍浦有治績蔡襄薦其才官至都官郎中

閩書莆田人物志

子容字南圭登皇祐五年甲科歷知惠州蘇軾謫惠州子容調護甚力相與唱和軾稱子容有拔薤之政卽其時也

元稹字道輔特科出身官終威武軍節度推官少與程頤同遊後頤嘗貽書勉之

略字作謀子容孫崇寧五年進士大觀中由秀州崇德縣尉遷修書局出提舉廣東常平宣和初在京東以不附燕雲之議忤王黼貶知瓊州先是瓊累政不治略下車之始恩威並行勸諭黎蠻使不爲擾瓊人德之改知潮州建炎中丐祠歸雅喜積書有萬卷樓

昀字文耕略弟紹興中知長溪縣以廉謹聞葉頤嘗對人稱其清貧遷潮州通判未上卒昀無室寓居華嚴寺中其喪也郡守鍾離松贈絹三百族人復出貲助焉

簡輿昀弟教授藤州以致知慎獨訓學者終長樂令

以上莆陽文獻道光舊志

宋宜同安人天聖八年進士嘗以便親簽判本州治平中除太常少卿  
寧初知漳州宜有文行為州里所推元祐中劉康夫作修學記言其行全  
乎人理 八閩通志

楊暈字公明惠安人景祐元年登進士第籍名下吏部銓將補官病卒於  
京師年纔二十七暈素好學居一室方牀環列冊書而飲食寢休其中早  
夜讀誦不休羣居談噉終日過耳若不聞也者於是博通經史嘗語其友  
蔡襄曰今世取士失其方面仕者多所矜伐智詐以為材能位通祿厚修  
心夸欲縱肆使其風流雷染於下媮靡敗爛我嘗得志當立誠苦節以警  
世俗襄甚聽其言 蔡忠惠集

黃晞字景微建安人

案直齋書錄解題作對人蘇頌楊子寺聲隔先生祠  
堂記明言建安人宋史及涑水紀聞澠水燕談錄王

壺清話萬姓統  
譜皆以為閩人

少通經及長著書數萬言以有道稱於閩中泉南陳靖福

唐陳絳在郡日爭以禮延請躬率諸生聽講於時士人習尚章句務為縝  
靡晞獨好古學不與眾合嘗做論語法言著書十篇其發明聖賢道義之

隱微與古今治理之得失詳矣自題爲聲隅子景祐中晞年已四十隨鄉貢至禮部上五十策求應直言詔科俱以後時不得與試已而歎曰老大不偶若此豈能復從諸少年校程式於場屋間乎可以逝矣然欲閱天下義理觀未見之書故久居京師不歸就舍僻處而士子競造其門家貧衣不蔽體得錢輒買書所費殆數百緡所蓄至數萬卷蠶殘或不給也宰相章得象與晞同鄉招之將以相門權利所趨辭不往康定元年同安蘇紳在臺省延致館中與其子頌等相切劘凡五六年頌由是得成所學國子直講石介聞其名使諸生如古禮執羔雁束帛聘晞將以補學職晞走匿鄰家不出嘉祐初公卿大夫交章論薦者數十人朝廷用樞密使韓琦言將以爲國子監直講晞自謝於宰相富弼曰老生豈任仕宦者必不可辭願得七品官歸南方足矣詔授太學助教嘉祐二年四月始拜敕徧謝知己才三日晚歸景德如意輪院一作隆興坊饒舍解鞍少憩謂院僧曰僕遠人也勤苦貧寒客路漂泊未嘗過飽今日方平生事畢且放懷酣寢一夕請

戒僧重無見喧僧諾之局屏遂寢翌日寂無所聞寺僧擊牖大呼已卒於  
楊矣一子在遠未及治命門人范遷張粵走告蘇頌即日往臨喪韓琦亦  
爲文奠之其略曰先生以學自富以道自貴身居草萊名暴天下公卿大  
夫知先生之賢薦先生之晚老得一命遽然而亡嗚乎豈天之於人既使  
其學與道之不窮也則其身固不可得而不窮耶不然何屯棟屈屈如是  
乎聞者莫不感痛旅櫬過江都藁殯楊子寺水陸經由處識與不識挽歌  
哀辭自屋壁至於木膚竹簞題記殆遍蘇頌謂其無位而得民至誠而感  
物近世未有也雖文學無所不通尤著心者春秋易其說以左氏凡例爲  
得聖人之微鄭康成象數極天地之蘊學者校量攻擊終莫能窮晦冥云  
又著揚庭新論十篇指陳當世之務有若言禮樂述作之所由則曰太常  
卿論言郡國武備之廢置則曰九州刺史論餘篇悉然卒後一子甚愚魯  
所聚及自著書皆散無存者

蘇魏公集  
宋史儀輿堂集  
道光舊志  
水經  
王壺清語  
通水燕談錄

陳烈字季慈侯官人性介癖少讀書苦不能記一口讀孟子學問之道無

他求其放心而已忽悟曰心未收何以讀爲閉門靜坐百餘日以求放心後遂一簣無遺居親喪水漿不入口五日及老哀慕如孩提嘗夢痛哭其母於中庭覺而大慟至旦平居動遵古禮御僮僕如對賓客鄉里人敬之冠昏喪祭請而後行每訓子弟必舉烈言行以爲式從學者常數百人與同邑陳襄鄭穆周希孟稱四先生慶應初預鄉薦黜於禮部遂不復踐場屋一日襄勉之求仕對曰烈不幸父母早喪幼而不知養長而能知父母則亡矣烈雖是沒身無意於世使烈一日得富貴尊榮無見父母不足以爲樂也至和開天章間待制曹穎叔知福州薦於朝授試校書郎充本州州學教授烈固辭嘉祐三年翰林學士歐陽修上言烈清節茂行非惟一方學者之所師致之朝廷必有裨補近聞命以官秩使教於鄉其禮甚薄未足以稱勵賢旌德之舉除安州司戶參軍召爲國子監直講皆不拜方辭避閒福建提刑王陶奏烈以妻林氏疾兩度醺遣歸其家十年不視爲林所訟乞奪所受恩司馬光時知諫院率同列爭曰臣素不識烈竊惟國

家常患士無名檢故臣僚舉烈以厲風俗烈平生操守誠實雖有迂闊不合中道猶爲守節之士當保而全之若夫婦不相諧則聽之離絕毋使節行之士爲橫辱所挫陶說遂不行熙寧二年襄除侍御史知雜舉烈自代不從後數年襄在經筵復上狀言烈心仁氣剛才智卓越學聖人之言而踐其行稽先王之法而適於時博通羣經尤明典禮其爲文章淵源浩博肆筆而成求之宿儒未有其比慶厯初以鄉貢試於禮部罷歸田里安貧力學積四十年著書數萬言仁宗嘗因近臣及本部監司論薦累降召命辭而不至世以爲潔身獨行之士是非知烈者也烈自以身載聖賢之道不爲苟進伏望陛下以禮特聘賜對清閒必有以上稱尊賢重德之舉元祐元年福建提刑喻陟復上烈行誼詔以烈名在仕版自仁祖嘗以經官命之而積遲不起宜從其所尙特授宣德郎致仕監司言烈雖老猶健請加任使明年落致仕仍充本州教授烈不獲已乃就職不受廩俸鄉里間遺悉卻之家租有餘則推以濟貧乏卒年七十有六

案石林燕語云烈行怪多僞蔡君謨母死烈往弔其家匍匐而進入問之曰此詩所謂凡民有喪匍匐救之者也其所爲類如此後爲妻訟其不睦事爲監司所按詔置獄劾治司馬溫公救之然亦竟坐罪續爲客撫摩同道山清話云李泰伯與烈同赴蔡君謨飯時正春時營妓皆在後園君謨留以佐酒烈已不樂酒行衆妓方歌烈擲杯案上作皇澤之狀踰牆攀木而遁泰伯賦詩有云山鳥不知紅粉樂一聲檀板便驚飛湘山野錄同東越文苑云蔡襄守福州數往請烈烈匿不肯見泛舟以去襄嘗以元夕令市中家燦七燈烈卽作大燈丈餘而縣書曰富家一盞燈太貧一粒粟貧家一盞燈父子相向哭風流太守知不知猶恨笙歌無妙曲大抵烈之爲人必矯枉過正迂不近情故識之者或甚其辭歟

鄭穆字閔中侯官人好學敦行六舉於鄉試第一者凡四次登皇祐五年進士初授河南府壽安主簿西京留守王舉正奏爲西監直講久之入爲

國子監直講累遷太常博士改集賢校理尋出通判汾州熙寧三年召爲  
岐王府侍講六年嘉王出閣賜緋改諸王府侍講時陳襄爲御史知雜因  
進對言府僚不可不慎擇人神宗曰德行必如鄭穆者乃可左右王也穆  
在王邸凡一紀每講說可爲勸戒者必反覆極陳岐嘉二王深敬禮之初  
岐王惡其夫人馮氏屏居後閣元豐二年春岐王宮火王乳母與二嬖人  
譖之曰火殆夫人所爲也王命內客鞠夫人婢婢不勝考掠遂自誣有旨  
命穆同中使鞠婢於皇城司穆案驗無實力言夫人爲左右所陷乃解明  
年請補外知越州先是鑑湖旱涸民多田於其中官籍而稅之既而連年  
水溢民逋官租積至萬緡穆悉奏免之未滿秩告老差管勾杭州洞霄宮  
元祐元年起爲國子祭酒三年揚王荆王請以穆爲侍講改揚王府翊善  
太學諸生上書乞穆爲師仍除祭酒兼徐王府翊善四年拜給事中兼祭  
酒始衆謂穆長者居門下必簡靜及遇事抗直無所避士論益多之六年  
三上表乞致仕以本官提舉洞霄宮敕過門下給事中范祖禹言穆目爲

布衣爲世所宗閩中稱四先生穆其一也平生歷官多掌學校在王府十餘年持身清謹未嘗有過擢居左省議論不苟復爲祭酒多士矜式年耆德茂力求引去在穆進退誠爲榮而爲朝廷計則可惜願勿輕聽其去以示朝廷貴老尊賢之美疏入留中太學諸生千餘人以狀詣宰相請留亦不報於是空學出祖汴東門外公卿大夫各爲詩贈其行明年卒年七十有五子珍軍事推官穆醇懿端正進退容止必以禮與人交終始不渝故人張景晟死遺白金五百兩託穆撫其子穆曰恤孤吾事也金於何有反金而收其子教育之至於長成世服其信義清波雜志入閩通志閩書道光舊志金相仙遊人慶曆中進士官光祿丞宋仁宗時王安石已有盛名相言安石議論詭僻名實炫耀雖爲一時文人終爲異日巨蠹因左遷通判宜州慶遠府志

范迪簡字道卿劍浦人慶曆四年第進士陳襄得其文二軸大加稱賞後調官至闕下以嘗受趙抃引薦不肯一謁識者偉之子峒峒屹嶠嶢俱登

科响官至龍圖閣直學士 八閩通志

虞肇字公初邵武人弱冠登慶歷二年第充御史臺推直用刑明審知

安軍未七十謝事歸 邵武府志

顏慥海澄人

一作龍溪

初與蔡襄以文章德行相砥讀書西湖白蓮院慶曆間

襄爲郡幕辟本州教授襄遷去慥遂卜隱于青礁倡明道學教授生徒孫

晞孔晞哲俱登第曾孫唐臣玄孫敏德五世孫幾六世孫復之

晞哲舉進士歷同安丞時行經界法被檄古田縣覈實官吏服其公平立  
祠與其邑宰饒公並祀之作碑曰饒顏碑改秩知縣清監司郡守列薦于  
朝

唐臣所居巨族里有綠石渡潮平可舟潮退則泥淖涉者苦焉唐臣乃於  
北涯墾土填淤築石爲隄長二千七百八十尺中作垂虹亭以憩行者後  
子敏德復築南隄至新亭凡一千九百尺歲久石沈淤中孫戴復砌石增  
而高之人爲謠云渡不艱待三顏

敏德字克和知循州除邕管安撫官至朝奉大夫邕數有峒寇敏德遇以威信卒不敢犯

幾字字治歷仕多在海外以安黎蠻有功就改京秩海外之民呼之爲爺諸峒剽掠昌化軍討捕平之詔改昌化爲南寧使守之就除瓊管安撫奏變差役爲徭役及請舉士依四川例與殿試陞等推恩士民懷焉

復之字子開有能賦聲試禮部尋補太學已遷太學錄調惠陽教授再調湖南廣幹卒于官爲人貌溫氣和不苟訾笑輕財好義表裏如一侍郎葉某薦十賢于朝復之其一也以上八閩通志閩書道光舊志

楊昭述字宗魯

一作景

浦城人賦性醇雅而長於議論鄉人多師事之縣主

簿陳襄每以鄉先生見待嘉祐中奏名出身授池州石埭尉選秀民進而教之邑人自是趨學者眾皆呼爲楊夫子任滿調海康令卒

八閩通志

黃裕字公裕莆田人璞曾孫通經有名創義齋以來多士立爲五規曰修身謹行立志抗節潛心經術留意世務限日收功旣沒皇甫泌諡之曰義

成逸士 萬姓統譜

林志寧國寧人嘗詣文彥博求教彥博云此閒無以相益有二程先生可往從之游因送至明道處歸語游酢楊時二人遂錄此語見程氏 龜山語錄

孫奕字景山閩縣人皇祐元年進士呂誨知開封薦知封邱縣及誨爲御史中丞遂薦爲臺推遷監察御史論新法爲鄧綰所劾出監陳州酒稅陳襄知杭州辟爲簽判後襄在經筵因薦之曰士行著於鄉閭節義信於朋友外雖淳朴中實強敏歷官所至皆以善政聞可謂循良之吏使當一路豈不足以厚俗而安民哉元祐初除福建轉運使 八閩通志

游烈字晉光邵武人幼以孝節稱從胡瑗學郡人知經學自烈始烈登皇祐元年進士熙寧二年由都官員外郎除提舉廣南東路常平以親老願徙便地未赴四年正月送審官東院知興化軍 八閩通志

黃伸字彥發邵武人遠祖惟淡教子皆登科世號黃五經伸與兄僅弟侑

齊名時比河東三鳳仲登嘉祐六年進士第知河南縣交彥博薦知泉州

建學校芝生於梁改建州稱治有瑞粟生屬邑奏最厯太僕司農卿子滂

汧沂

邵武府志八閩通志

游冠卿字公忠福清人居東塘嘉祐八年進士拜朝散大夫初福清儒學  
在縣治東祀先聖像于三禮堂冠卿輸地爲學宮千百年衣冠文物賴焉  
福清縣志

徐唐字守忠寧化人未冠授春秋于鄉先生吳果不兩月誦析如流邑宰  
某奇之俾受業於李觀觀曰胡先生講春秋于上庠子盍造焉於是負笈  
京師質疑問難旁通群經諸子屈服遂見知於歐陽修未幾薦之仁宗召  
見講易嘉祐三年奔母王氏喪以歸迄廬墓側不復出 八閩通志

吳儀字國華劍浦人父輔字鼎臣登天聖八年進士厯道州推官有傳寇  
至者郡僚欲毀橋城守輔曰橋而南皆吾民也可棄乎寇卒不至儀自少  
篤志疆學當嘉祐治平間士爭工爲聲調偶儷之文儀棄科舉業獨以窮